

## **Cama Tsətsəfə Nə Tanggərma Nə Biturusu**

<sup>1</sup> Cama tsətsə sara ara yau, nayi Biturusu, cama Səsə nə Yesu Kərsiti.

A nda nə njira Hyal cadəbiya, njira vər nggya məthləpikur wu 'yi'yir nji, nanda ngə njira tətəlna dzə a ndu 'yi'yi Pontusu, Galatiya, Kapadokiya, Asəya, ənga Bethləniya,

<sup>2</sup> nanda ngə njira nji cadəbiya ənggər kəra Hyal Tada sənbiya tsu kadəu, lagur thləbiya nda aga thlər cicau lagu Mambəl aga hya də njir bəla ndər Yesu Kərsiti ənga hya də nji cicau lagu mashi nyi kəra nji 'wu'wucir nggər hyi.

Ta'yi mayiwakur nə Hyal ənga nggya jaməu ja nggya nərhyi gagađau.

### *Fal Hyal Arya Fərkər*

<sup>3</sup> Fal a nggyari anə Hyal Tada ənga Diya Thlagər mən Yesu Kərsiti! Naja kəra lagur madiya təhudə nyi, nga ji nə mən pi mafəliyangəu, a shili wu nggyabiya nə fərkər lagur hya'ana Yesu Kərsiti sara vir tau.

<sup>4</sup> Ji məl abangau, aga mənə uya sər fa'aki kəra gəra ndzau, ənga gəra dəzau, kəra nji fiya hyi a dəməlmau,

<sup>5</sup> sər fa'aki kau, ca ngə pi gəra kudəu kəra nərhyi, nahyi nji kəra Hyal wu dənəma nyi, ja vər bəla anə hyi lagur mbərsar hyi, kəra a vər shili wu joməya zaman.

<sup>6</sup> Arya kə nga hya vər nggya ənga hudə pip-ida gagađau, alaga kə pəci kushu, hyu uya hudə

ndzəndzə lagur dzəbiya dzə nə də kəra wu shili anə hyi wu lagu paməpaməu.

<sup>7</sup> Najaka ɔwaɔwatə tsu aga ja cabiya jirkura mbərsar hyi ngau, ənggər kəra nju thlə əndzə wu u'u, alaga kə ju ndzau, ama mbərsar hyi a ndiyar əndzə nadəu, arya mbərsar hyi kau, a shiliri ənga fal ənga kadakadarkur ba ha kər anə Yesu Kərsiti.

<sup>8</sup> Alaga kə nahyi saya lar nyi mai kau, ama hyu yiwu nyi. Alaga kə nahyi a'yi a vər lari nyi kabəngə kə mai, ama patə hyi a hənggər hyi ənga ja, kə hyi nyabiya dzau ənga madiya hudə pipida kəra nji gəra sən dəgabiya,

<sup>9</sup> arya hya vər uya mbədə nə piya hyi, ca ngə səra də hyi fər mbərsar hyi wu Kərsiti.

<sup>10</sup> Nabi'yar kəra ndər ar kəra mayiwakur kəra wu sa shili ənga mbədə anə hyi kau, a dər nda aga nda walbiya ləkakadə gagadəu ənga dəngər nda patəu, aga nda nggabiya sə ar kəra mbədə kau.

<sup>11</sup> Ndu yiwu nda sənbiya tara pəci a nuwa ənga tara abari ngə səra Mambəl Kərsiti nar nda wu nda də kə wu də. Səra Mambəl Kərsiti nar nda kə ca ngə ɔwaɔwatə kəra ju nda sa ənga kadakadarkur kəra wu shili ayukudə nyi.

<sup>12</sup> Mambəl a cabiya nda ri, abər a'yi aga kərnda nga nda vər ndər kə mai, ama nda vər ndər ar kəra hyi, ar pəcira nda vər ndər arya səra nji nar hyi, njira vər tətəlna ndəshigu anə hyi lagur Mambəl Cicau kəra nji səwa sara dəməlmau. Alaga waladi'yar a cimər nda aga nda sənbiya sə ar kəra mbədə nə Hyal anə mən.

*Hyal Ngga Nji Nyi Aga Nda Nggya Cicau.*

<sup>13</sup> Wazha ama, arya sə mənahə kəra Hyal məliya hyi kau, hya mbiya dzə aga məl səra tsa'a, hya kəkəya kərhyi, ənga hya fuwa fərkərər hyi patəu wu mbədə kəra Hyal wu nda nə hyi wu Yesu Kərsiti ar pəcira ji cabiya dzə anə nji patəu ar pəcir shili nyi.

<sup>14</sup> Ta hyi də wazha ama njir bəlar ndər, a sara hya bəra fuwa kərhyi wu suna paməpamə nə kumər dzə ənggər kəra hya vər nggya dədəm ta mai, ar pəcira hya vər nggya wu gəra sən Hyal ta.

<sup>15</sup> Ama ta də ndəra ngga hyi ndə cici ngau, nahyi tsu kəl hya də nji cicau wu kalar səra hyu məl.

<sup>16</sup> Arya tsətsəfə nga nyi wu ndər Hyal abər “Kəl hya nggya cicau arya naye Hyal ndə cici ngau.”

<sup>17</sup> Arya hyu ngga nyi “Tada,” ma hya vər kədi Hyal, naja ndər məl numa anə kalar ndə tsa'a aga səra mələ ja, a'yi ənga tazhira mai. Hya kyaga nggya ənggər məthləpi wu duniya kau, hya nggya wu hivər Hyal kəra cabiya abər hyu gənggər nyi səli.

<sup>18</sup> Arya a sənər hyi abər a'yi ənga səra wu ndzə nga nji bəliya hyi mai, sə ənggər thladla alaga əndzə mai, nji bəlbiya hyi sara wu nggya papatagə kəra hyi highibəri sara ara əjir hyi.

<sup>19</sup> Ama Hyal mbədəbiya hyi sara wu nggya papatagə ta lagur pə mashi jigajiga nə Kərsiti kəra ənggər zər gam kəra gəra ənga vazau alaga ənga ndzə ar dzau.

<sup>20</sup> Naja ngə Hyal cadəbiya aga ja tau aga mbədə mən, kadivira ji məliya duniya. Hyal məliya najaka sə lagur səwa Kərsiti a shili wu duniya aga sa dləwar hyi.

<sup>21</sup> Lagu nyi nga hyi hənggəri ənga Hyal ndəra hya'ana nyi sara vir tau, ji nə nyi kadakadarkur,

aga mbərsar hyi ənga fərkərər hyi ja nggya wu Hyal.

<sup>22</sup> Ta də a cinar hyi kərhyi lagur bəlar jirkur nə ndər Hyal aga hya də njir ca yiwukur anə kərhyi, yiwa mə kərhyi gagadau sara wu dəfwa hyi.

<sup>23</sup> Arya Hyal a nə hyiri lagur nggya mafəliyangə, a'yi sara vu nggyabiya kəra wu tə mai ama sara vu nggyabiya kəra wu nggya ba'anuwə. Hyal a məliyarı nggyabiyar hyi mafəliyangə lagur cama nə ndər nyi kəra wu lər pi nə ba'anuwə.

<sup>24</sup> Arya tsətsəfə ga nyi wu ndər Hyal, abər,  
“Patər ndapi ənggər sar nga nda,  
ənga kalar kadakadarkurər nda ənggər  
mambəla wu nga nda;

sar wu ul mambəla wu tsu wu pəpau,

<sup>25</sup> ama ndər Thlagəu a ta'yi ba'anuwə.”  
Najakə ngə ndər kəra njir nu Thlagəu, tətəlna nahyi.

## 2

<sup>1</sup> Ta a dəari Hyal a nə hyiri lagu nə nggya mafəliyangə ənggər wazha nyi, hya sara məl sərə wu takasiya ndə mai, alaga thlafati aga ngguta ndə mai, kwadashima, shishikur, ənga na ndə pampaməu.

<sup>2</sup> Ənggər zər mamanji wu caguli aga sa u'wa, ta'yi hya də njira wu caguli aga ndər Hyal aga hya daɓaga hau wu mbədər hyi.

<sup>3</sup> Kəl hya məl abangau, ta a dər hyi abər Thlagə Yesu mənəhə nga ja.

*Tsəka Mbəmbədəu Ənga Nji Dədəm*

<sup>4</sup> Ənggərə hyu shili əgya Yesu Kərsiti, ndəra ənggər tsəka mbəmbədau, kəra nji piyari kau, ama Hyal a cadəbiya nyi ri ənga nə nyi kadakadarkur.

<sup>5</sup> Nahyi tsu ənggər tsəka mbəmbədə nga hyi ənggər naja, həhər nga hyi ənggər Ki Hyal aga hya də dabə dzə pubu'yar cicau, aga hya lər sadaka dlədləwu anə Hyal lagur Yesu kərsiti.

<sup>6</sup> Arya tsətsəfə nga nyi wu ndər Hyal abər,  
“Kəja ya vər la tsəka wu məlmə Səhiyona,  
tsəka kəra cacadə dlədləvau,  
ənga kalar ndəra hənggəri ənga ja,  
naju nda gu səli mai.”

<sup>7</sup> Agabəngau, anə hyi nahyi njira hənggəri, tsəka kau wu shili ənga dləvau anə hyi, ama anə njira nggəl ara hənggəri ənga ja, ənggər kəra tsətsəfau wu ndər Hyal, abər,

“Tsəka kəra njir hər didana  
a dəri tsəka təghə hər.”

<sup>8</sup> Ənga tsətsəfə nga nyi tsu,

“Naja tsəka kəra wu shili nga thlə hi anə nji  
ənga naja ngə tsəka kəra məliya nja dlanakər.”  
Ndu thlə hi ara ndə nggəl ara bəlar ndər Hyal, kəra ca ngə sərə mbamba tsu kadəu aga nda.

<sup>9</sup> Ama nahyi njira Hyal dəmbiya ngau, nahyi njira Hyal dəmbiya aga hya də pubu nə təlkur nyi, nahyi nji kəra Hyal fiya aga dləvə nyi, nji gə Hyal nga hyi, aga hya nar nyi anə alenji sə mənəhəu kəra ji məliya hyi, naja ndəra həbiya hyi sara wu kuthləu a shili wu mbəmbəl dədəgur nyi.

<sup>10</sup> Dədəməu, a'yi hyi nji gə Hyal mai, ama kabəngəkau, a dər hyi nji nyi ara hyi hənggəri ənga

ja. Dəðəməu, nahyi a'yi uya təhudə Hyal mai, ama kabangəkau a dər hyi njira uya təhudə nyi.

<sup>11</sup> Nahyi bazhir 'wa də 'yar, ənggər nji shishili ənga məthləpi nga hyi wu duniya, yu kədi hyi, aga hya hwinakər sara ara sərə wu shili ənga bikau kərə hya vər papa əni wu dəfuwa hyi.

<sup>12</sup> Bəgə nggyabiyar hyi wu pama njira a'yi wu sən Hyal mai, a də mənəhəu, alaga ma ndə na nahyi njir məl sə dəmwa'yu, ndu sən lari sər mələ hyi kərə mənəhəu, ba nda dləvə Hyalər hyi ar pəcir shili nyi.

### *Həya Mə Kər Anə Njir Səm Təlkur Ar Kərə Hyi*

<sup>13</sup> Hya lər kərhyi lagur məl thlər ənga sərə kalar njir səm təlkur kərə nji ciya wu pama nji ar kərə hyi wu na, alaga naja ngə təl dəgaləu. Hya məl abangə aga gənggəri nyi səli anə Hyal.

<sup>14</sup> Anə gwamna tsu, hya məl thlər ənga sərə ndu na, arya nanda ngə njira Hyal fuwa hyi wu pəla nda, aga nda hwathləya njira gərə nggar ndər, ənga nda faliya njira wu nggar ndər.

<sup>15</sup> Arya sərə Hyal wu cim ngau, ya məl sərə mənəhəu. Lagu kə nga hyu hədiya miya njir ndər puyiu kərə wu biya sara wu miya nji dza .

<sup>16</sup> Hya nggya ənggər njira wu kambəkür kərnda, ama hya sara piyarı kambəkür kau, ja də lagu kərə hyu məl sə dəmwa'yi ngə mai, ama kəl hya nggya ar viya mafa Hyal.

<sup>17</sup> Hya gənggər nyi səli anə kalar ndau, ənga hya cabiy.a nyi yiwukur anə kuvwar hyi njir nu, ənga hya gənggər nyi səli anə Hyal, ba ənga tsu hya lər dəgalkur anə təl.

<sup>18</sup> Nahyi mafa'yar, hya lər kərhyi anə tarkir hyi ənga hudə zəməu, a'yi njir məl sə mənəhə anə hyi

waci mai, ama ətsu hya məl səra mənəhəu anə njira wu məl sə dididi anə hyi.

<sup>19</sup> Arya wu pina huda Hyal ma ndə wu səsə'u sa bwaḃwatə gəra vazə nyi a'yi aara naja nə Hyal.

<sup>20</sup> Ama mi ngə sər bwasər hyi ma nji dəgə hyi arya sər mələ hyi kəra didida? Ama ma arya məl sə mənəhə nga nji dəgə hyi kakal nga nyi wu mwar Hyal.

<sup>21</sup> Arya Hyal ngga hyi aga hya lar bwaḃwatə ənggər kau, arya Kərsiti ma a sar ja bwaḃwatəu anə hyi aga ja cabiya hyi abər nahyi tsu wu nda lar bwaḃwatəu.

<sup>22</sup> “Naja a'yi saya məliya bikə mai, ənga sər ngguta vi a'yi wu miya ja mai.”

<sup>23</sup> Ənggəra ndə nggənggəl nyi naji shabiya nda ənga nggəl mai. Ənggəra ji sa bwaḃwatəu, naja a'yi pahəna miya nə gərah nda nə kibiya mai. Ama ba ji lər kərnyı anə Hyal ndəra wu məl numa nə jijiri.

<sup>24</sup> Naja ənga kərnyı ngə hər bikər mən wu dza ja a dar wu dladlakau aga mənə shabiya nyi yi anə bikau ba mənə da njir məl səra tsatsa'a. Lagur takasə kəra nji takasə nyi ta nga mən uya shilgəbiya dzau.

<sup>25</sup> Kadivira hyi da njir nu Kərsiti, ənggər təmahəu sasa nga hyi, ama kabəngəkə kə hya njir nu nyi a shar hya shili əgya ja ndər bəla, ənga ndər tsam nggyabiyar hyi.

### 3

#### *Nggyabiya Mathləkə'yi Ənga Shilir Nda*

<sup>1</sup> Ənggər kəra yi na anə mafa ta, nahyi mathləkə'yi tsu, kəra njir nu Kərsiti, hya lər kərhyi

anə shilir hyi aga ma alenyi shili a'yi wu pama nda kəra gəra hənggər ənga ndər Hyal ndu sən kəthləbiya nda a shili, arya sər məla mathləkə'yir nda, ba nda hənggəri ənga Hyal.

<sup>2</sup> Ar pəcira shilir nda lari nggyabiyar hyi kəra jijiri ənga ənggəra hyu gənggər səli anə nda ba nda da njir nu Kərsiti.

<sup>3</sup> A sara bəthlə dzər hyi nə gumagumkur a da səra nju lari ənga li mai, sə ənggər ləm kər ənga ha səra nji məliya sara wu əndzau ba ənga kar ha nə gənna gəngəu.

<sup>4</sup> Kuji gumagumakurər hyi ja da sara wu dəfuwa hyi, naja nəgə gumagumakur kəra gəra dəzau, naja nəgə nggya nə həya kər, ənga nggyabiya jaməu əkkə'yi nji, nanda nəgə nggyabiya kəra mənəhə gəgəda wu mwar Hyal.

<sup>5</sup> Arya lagur nggyabiya kə nəgə mathləkə'yi kəra wu nu Hyal ənga fiya fər kərər nda wu Hyal dədəm məliya nggyabiyar nda mənəhə gəgəda wu mwar Hyal lagur lər kərnda anə shilir nda.

<sup>6</sup> Ənggər kəra Saratu, mala kəra bəlar ndər sal nyi, İbrahimu, ənga ngga nyi ənga thlagə da. Nahyi tsu, ku'yi nyi ngau nə jiri, ma hyi məl səra tsatsa'a gəra ənga hivər kalar sau.

<sup>7</sup> Ənggər kə tsu shili, hya nggya ənga mathləkə'yir hyi ənga nda wu dəfuwa hyi, hya fiya nda ənga gənggər səli arya nanda nji tətəwa, ta da wu cir zəmə nga hyi wu sər fa'aki nə mayiwakur nə pi. Hya məl abangə a sara vanyi sə a kar kədi Hyalər hyi.

*Sa Bwaḅwatəu Njir Nu Kərsiti Arya Məl Sə Mənəhəu*



<sup>8</sup> Ayukuda ndər kau, yu na anə hyi patəu, bəgə hya nggya ənga daβər kər, ənga hya nggya ənga təhudəu əgya kərhyi ənga hya ca yiwukur anə kuvwar ara nahyi zamə ənga hya ca ku'wukur anə kuvwar hyi, ba ənga hya həya kər.

<sup>9</sup> Hya sara kyi dəmwa'yikur anə njira məliya hyi dəmwa'yikur mai alaga hya nggəl njira nggəliya hyi mai. Ama hya da nji fə barka arya aga məl sə mənəhə ngə Hyal ngga hyi aga hya da njir dləw barka ara ja.

<sup>10</sup> Arya tsətsəfə nga nyi wu ndər Hyal,  
“Kalar ndəra wu yiwu nggyabiya mənəhəu,  
ənga ju yiwu ja nggya cacaguli,  
kəl ja kar kiyara ja ara ndər dəmwa'yu  
ənga miya ja ara thlafati.

<sup>11</sup> Kəl ja piyari məl sərə dəmwa'yu ja məl sərə mənəhəu;  
ənga kəl ja gal nggya jaməu ənga kalar ndau  
ənga ja nərdzə gagadau aga nggaya jaməu.

<sup>12</sup> Arya Thlagəu nga vər bəla nji tsapəu,  
ənga himiya ja papahau aga səhimi sərə ndu  
kədi nyi.

Ama Thlagə wu sha bama anə njir məl sə dəmwa'yi mai.”

<sup>13</sup> Wa ngu sən məliya sə dididi anə hyi ma hyi ciya kər aga məl sərə mənəha?

<sup>14</sup> Ama ma hyu sa bwaβwatəu arya məl sə tsapəu, a uyar hyi barka ara Hyal. Agabangau, hya sara hivər dawar hyi ənggər nanda mai, ənga hya sara gərahə arya sərə ndu məl anə hyi mai.

<sup>15</sup> Ama wu dəfuwa hyi, hya ha kəra Kərsiti ar viya Thlagər hyi. Hya nggya papabau cumu aga hya uya sərə hya sən shaduwa anə ndəra a vər yiwa

hyi ar kəra fər kər kəra hyi əni wu Kərsiti. Ama ga shaduwa nyi wu batsəkur kər ba ənga gənggər səli.

<sup>16</sup> Ətsu hya nggya ənga dəngar hyi cicau, aga njira wu ndər dəmwa 'yi ar kəra thlər mənəhər hyi kəra hyu məl wu Kərsiti nda gu səli arya səra ndu na.

<sup>17</sup> Ma yiwu huda Hyal ngau, a ndiya ənga mənəhəu, aga hya sa bwaḅwatə arya məl səra mənəhəu a mwara sa bwaḅwatə arya məl sə dəmwa 'yu.

<sup>18</sup> Arya kərsiti tau aga zəməu arya bikə nə nji patəu. Naja ndə tsapə tau arya nji tsapəu ənga nji gəra tsapəu, aga ja hər hyi a shili anə Hyal. Nji tsiya nyi wu kumər dzau ba ji hya'ari ənga pi lagu Mambəl.

<sup>19</sup> Ənga mambəl kəra hya'ana nyi sara vər tau ngə ləbiya nyi a vwar vira nji fiya mambəl nə nji tətə ari ba ji vuwa tətəl na nda ndər Hyal ar kəra hya'ari nyi səra vir tau.

<sup>20</sup> Mambəl'yar kə ngə mambəl njira kaḁəu nggəl ara bəlar ndər Hyal, alaga kə Hyal a munyari ənga nda ar pəcira Nəhu a vər hər kwambwal ari. Ar pəci ta, nji diyawu waci ngə uya mbəḁau lagu 'yimi, nji cisu wacu.

<sup>21</sup> 'Yimi ta ar pəcir Nəhu ta ngə cabiya culi baḅətizəma kəra mbəḁana hyi kabangəkə tsu, ama mbəḁə kəra hyi uya kau, a'yi lagur ci didi ənga 'yimi sara ar dza hyi nga hyi uya mai, ama lagur yiwa sara ara Mambəl Hyal ja cina dəngar hyi. Baḅətizəma kəra mbəḁana hyi kau, ji məl abangə lagur hya'ari Yesu Kərsiti sara vir tau.

<sup>22</sup> Naja ndəra hya'ari sara vir tau a ma'yiri ja a dəməlməu, naja ngə ndəra a vər nggya ar tsi mazəma Hyal. A dənə nga ja vər səm təlkur ar kəra

waladi'yar ənga təltəl'yar ənga njir dənama, ba ənga njir dənama təlkur papatəu ənga ndə fiya kəra nda əgya kida ja.

## 4

### *Njir Nu Kərsiti Nda Nggya Njir Pina Hudə Hyal*

<sup>1</sup> Ta da hyu səni abər Kərsiti a lar bwaḁwatə arya mən wu kumər dza ja, agabangau zamda 'yar, ta'yi hya nggya ənga dənga abangau, aga hya sən səsə'wuri bwaḁwatə wu dzau, arya kalar ndəra lari bwaḁwatə wu dza ja, a ndiyar ja dənama bikau.

<sup>2</sup> Arya najakau, tsu ju dumwa ənga nggya suna suna nə ndəndəkur nə kumər dzə kəra wu nda bəliya nyi mai, ama ju məl sərə pina hudə Hyal wacu.

<sup>3</sup> Arya a sanar hyi pəci gangə dəḁəmə a vər məl sərə njira gərə sən Hyal wu yiwu məl, sə ənggər nggya nə səsukur, ənga suna nə kumər dzau ənga sa sə sasa, ənga yiwu nggya wawahə gərə kər, ba ənga nu katəu, kəra sə zhizhigər ngau.

<sup>4</sup> Ənggərə tsu hyu bəra daḁə kər əkkə'yi nda wu məl sə dəḁəmwa 'yi mai, ba ndə lari ənggər sə dədəgur ngə anə nahyi kəra biya sara wu nda, ca ngə da ndu nyabiya hyi ənga nggəl.

<sup>5</sup> Ama ndu nda ləri sakida sər mələ nda ənga miya nda anə ndəra a nggyar tsa'a aga məl numa anə njira ənga pi ənga nji tətəu.

<sup>6</sup> Ca ngə sərə da nji tətəlna ndəshigu anə njira ənga pi ənga nji tətəu, aga Hyal a daḁaga məl numa anə nda ənggər nə njira wu kumər dzau, ama aga nda nggya aga Hyal wu mambəl ənga Hyal.

<sup>7</sup> Pəcir kudıya nə kalar sau a dər ləhəu. Agaban-gau, kəl hya dəngabiya sə mənəhəu, ənga hya kəkəya kərhyi aga hya dəbaga sən kədi Hyal.

<sup>8</sup> Səra ndiya sə'yar kə patəu, ca ngə hya ca yiwukur anə kuvwar hyi gagađau, arya yiwukur wu dazhəna bikə gangə kəra nji məliya.

<sup>9</sup> Hyə də njir dləwu məthləpi anə kuvwar hyi ənga tsi məməthləu.

<sup>10</sup> Kalar ndə wu pama hyi ja məl thlər ənga kalar culi lə sə lələ kurthlə kəra Hyal nə nyi aga dləwa kuvwa nyi. Wu lagu kə nga hyu nda məl thlər ənga lə sə lələ nə Hyal mənəhəu.

<sup>11</sup> Kalar ndəra lə sə lələ nyi, ca ngə tətəlna ndər Hyal, bəgə ja na səra Hyal na aga ja na. Kalar ndəra lə sə lələ nyi, ca ngə məl thlər anə nji, bəgə ja məl thlər ənga dənəma kəra Hyal nə nyi aga wu kalar lagu nja lər fal nyi anə Hyal lagu Yesu Kərsiti. Bəgə kadakadarkur ənga dənəma ja nggya ba'anuwa. Amina

### *Sa Bwaḍwatə Nə Njir Nu Kərsiti*

<sup>12</sup> Nahyi Bazhi 'wa də 'yar, ja sara də sə dədəgur anə hyi ma hyi sa ḍwaḍwatə ar pəcir dzəbiya dzə mai, a sara hya dənga a bər vanyi sə mafəliyangə nga vər də anə hyi mai.

<sup>13</sup> Ama arya kau, hya caguli ara hyu sa ḍwaḍwatə dəbə ənga Kərsiti, ara ar pəcira nju nda cabiya kadakadarkur nyi, hyu nda nyabiya dzə ənga caguli gagađau.

<sup>14</sup> Hyal ngə wu fənggər hyi barka jijiri ma nji nggənggəl hyi arya nahyi njir nu Kərsiti, arya Mambəl kadakadarkur kəra ca ngə Mambəl nə Hyal ja nggya ənga hyi.

<sup>15</sup> Ma nji nə hyi ɔwaɔwatəu, ja sara ɔa ara nahyi njir tsa ndə mai, alaga njir həl ənga alaga njir batal paməpaməu, ənga alaga njir fə miya a vu ndər ndau.

<sup>16</sup> Ama ma hyu sa ɔwaɔwatə aya nahyi njir nu Kərsiti, ja sara ɔa sə səseli anə hyi mai, ama hya fal Hyal ara nju ngga hyi njir nu Kərsiti.

<sup>17</sup> Pəci ta kəra Hyal wu nda məl numa anə nji a ɔari, ənga ju nda dzəgwa məl numa kə wu ki nyi. Ma ɔa ar mən njir nu nyi nga ju dzəgwa, mi ngu nda ɔa ənga njira gəra dləwuri ndəshigu nə Hyala?

<sup>18</sup> Ənggər kəra ja tsətsəfə wu ndər Hyal,  
“Ma ɔa dzadzau anə nji gə Hyal nda uya mbəɔau,  
mi ngu nda ɔa ənga njira gəra hivər Hyal, ndu  
dumwa nga nggya wu bika?”

<sup>19</sup> Agabangau, patər njira wu sa ɔwaɔwatə ənggəra Hyal wu yiwu ja ɔa, nda bəra dumwa ənga lər kərnda anə Hyal ndəra məliya nda ənga nda dumwa ənga məl səra mənəhəu.

## 5

### *Tədə Himi Da Anə Nji Gə Hyal*

<sup>1</sup> Kabangəkə ya vər tsəfə anə hyi njir tədə mwa ənga yu kədi hyi aya sər ɔwakər kəra vər ɔwakər anə ɔabə dzə nə njir nu. Nayi tsu ndər tədə mwa ngau ənggər nahyi ndəra lari sa ɔwaɔwatə nə Kərsiti ənga tsu ndəra wu nda dləwuri kadakadarkur kəra Hyal wu nda cabiya mən.

<sup>2</sup> Yu kədi hyi, hya bəla nji gə Hyal kəra wu tsa hyi. Aya nji nə hyi thlər nə bəla nda ənggər kəra njir bəla a vər bəla fəgər nda. Hya sara tədə mwa anə nda ara nji ciwa hyi a gwa mai. Ama hya tədə mwa anə nda ara yiwur huɔa hyi nga hyi hənggəri

hya məl abangə ənggər kəra Hyal wu yiwu hya məl. Hya sara məl thlərər hyi aga hya uya gənna waci mai.

<sup>3</sup> A sara hya ca dənama anə njira nji fuwa wu pəla hyi mai, ama kəl hya da sər fə li kəra ndu fa'abiya hiya nyi.

<sup>4</sup> Ar pəcira Kərsiti ndər bəla kəra dəgal wu nda cabiya kər ar babal, hyu nda uya mitawal nə kadakadarkur kəra gəra dəzau.

<sup>5</sup> Abangə tsu nahyi wazha baduwari, hya həya nyi kər anə njira nggurum. Patəkura hyi kəl hya nggya ənga həya kər anə kuvwar hyi, arya, tsətsəfə nga nyi abər,

“Hyal wu papa njir bəwadzau,

ama ju ca ku'yakur anə njira ənga həya kər.”

<sup>6</sup> Agabangau, hya da ənga həya kər əgya kida dənamar Hyal, aga ja nda həna hyi ma pəca nyi a dari.

<sup>7</sup> Hya fuwa patər səra wu bəla hyi wu tsa Hyal ba hya far əni ara ju yiwu ja dləwar hyi.

<sup>8</sup> Hya kəkəya kərhyi, ənga hya nggya papahə li, arya dawar hyi, shatan, kəra ənggər ləvari kəra vər hwavi kəra vər gal ndəra ja daḡaga dəhu.

<sup>9</sup> Hya ka nyi ara shili ara hyi, hya ta'yi ənga dənama wu mbərsa, ara hyu səni abər zamər hyi'yar kəra a ndu duniya patə a vər sa culi najaka bəwəwatə kəra hya gwa kau.

<sup>10</sup> Ama Hyal ndər ca ku'yakur anə nji patəu, naja ndəra ngga hyi aga hya da wu cir zəmə ənga Kərsiti wu kadakadarkur nyi nə ba'anuwa. Ayukudə hyi lar bəwəwatə nə pəci kushu, ju sa bəra shabiya hyi a shili ara kərny, ba ja məliya hyi bəbalu, ənga tata'yi pir, ba ənga gəra kənggəḡau.

<sup>11</sup> Səm təlkur a nggyar nə nyi ba'anuwa. Amina.

*Usadzə Nə Bitrusu Nə Jomə ndəl*

<sup>12</sup> Silasu ngə dləwar da yi tsəfəri najaka cama tsətsəfau, ndəra zəmə məl thlər tsa'a miya dəfu, yi tsəfər hyi sə yidau aga ya tsətsəkur dəfuwa hyi ar kəra mbərsar hyi ənga yu yiwu ya bəra nar hyi abər ku'yakur Hyal kəra ju ca anə mən jiri nga nyi ənggər kəra yi nar hyi ta. Hya dumwa ənga hənggəri wu ja.

<sup>13</sup> Nanda njir nu Kərsiti kəra wu Babilanu, njira nji cadəbiya əkkə'yi hyi, nda vər usa hyi, abangə tsu zər da Markusu wu usa hyi.

<sup>14</sup> Hya usar kuvwar hyi ənga bərpə dzə nə yi-wukur.

Bəgə Hyal a nə hyi hudə pərtə patəu wu Kərsiti. Amina.

**Ndəshigu'yar Fodəu Ənga Thlər Cama'yar**  
**The New Testament in the Marghi South language of**  
**Nigeria: Ndəshigu'yar Fodəu Ənga Thlər Cama'yar**

copyright © 2024 The Seed Company

Language: (Marghi South)

Contributor: Initiative for the Translation and Development of African Languages

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-13

---

PDF generated using Haiola and XeLaTeX on 13 May 2025 from source files dated 13 May 2025

63471087-0de7-5f4b-aa1f-ca2e66571a95